

四庫全書

集部

欽定四庫全書

集部

鄭峰真隱漫錄卷三十二至
四

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官中書臣張曾效

謄錄監生臣陳秉寧

欽定四庫全書

鄒峯真隱漫錄卷三十一

宋 史浩 撰

書

上知紹興府俞閣學乞修黃山橋書

某嘗聞莆陽蔡公端明之守泉南也旌車首至詢民疾
隱僚屬有欲裨公之善政者作而言曰為政之大無如
活人此邦瀕海南俯大江潮汐吞吐實海之匯風平浪

嬉過者愕眙時當秋靈建劍諸郡山洪兢注驚湍怒瀾
拍岸成屋憧憧往來載以巨舩闕

蔡公然之始度工鳩財以舉闕

首以徇人始併作或曰作橋將以
為利今利未成而先殺數百人可乎蔡公從容呼父老
曰每歲溺者幾咸曰少至數百人蔡公欣然曰吾以一
歲之溺而成是橋為萬歲計當活幾耶於是衆乃嘆其
不及橋成抵今賴之所活無算天下始知蔡公之政不

為小補矣某每得是語於先生長者間竊嘆生後其時
不得斯人而師事之廼者效官于此適遇某官閣下師
帥一道愷悌父母神明智權不待紀述藉然萬古楓宸
眷倚正圖任於老成槐揆交親每咨詢於故實可謂當
世之人傑一時之表儀蔡公之政不足進於閣下乎某
於是時一介小吏竊食支邑不量猥賤思如昔人欲裨
閣下之善政乃以境內黃山一橋為請已蒙賜許夫何
流俗健於誣訟似有掣肘幸賴恩光燭其無佗使終就

是役此誠蔡公之用心也夫以蔡公不憚殺數百人以濟其事今一傭僧擁貲數萬不肯捐毫毛以償其師之願至於屢訟其人可見矣使破一傭僧之積成是橋不猶愈於殺數百人乎况其所出又止萬分之一宜乎閭下之所不恤也伏念某資稟不高行能無取獨知遠慕古人印之今人其賢耶思欲竭盡犬馬以攀附其鱗翼其不賢耶寧緘唇晦迹自取於無用之地則今日之謀其心固不待言而喻向使此橋不就歲溺百人萬歲計

之所喪百萬是百萬人之命在閭下一可否之間爾伏
惟察其如是排斥羣議賜以必成異時輪蹄絡繹往來
投足獲為夷塗實閭下之甘棠某雖愚陋豈不能以翫
斲之文刻之豐碑仰頌閭下之盛美耶噫子產仕鄭以
其乘輿濟人於溱洧孟氏以為惠而不知為政然則知
為政者果不在彼而在此矣伏惟幸赦其狂而進之

上浙東游提舉書

某嘗謂經之不可不明也久矣學士大夫裁冠博帶高

視濶步莫不自謂我明經然而有得於紙上有得於曾
中二者不可不辨也夫窮年挾策皓首無聞脣腐齒落
而僅記其文禿筆殫墨而粗釋其字及乎用之脩身行
已措之天下國家鮮不倒行而逆施此得之紙上世所
謂腐儒者是也視聖言為藥石指書冊為筌蹄心開意
悟而不囿於語言六通四闢而不膠以形器及乎用之
脩身行已措之天下國家莫不曲全而超詣此得之曾
中世所謂通儒者是也三代之下通儒常少而腐儒常

多以紙上徒勞而曾中昧也天佑我宋篤生鉅公相視以道而相得以心堯舜禹湯文武周孔孟氏之後經晦而復明學絕而復續先察院尤其傑然者是故當時一言之出人爭播傳一事之施人爭紀錄抵今炳炳如日星之麗天草木之華地愈久而愈光明又得閣下克世其學故耳恭惟閣下高明博洽博大粹全過庭受教親得其妙而持之以簡古將之以謹靜天下之士翕然引重以為先察院之道不墜矣今閣下以斯道立朝受明

天子之知入都省寺出領外臺風采聲華馳達萬里而先察院之英風不亡矣豈不偉歟豈不偉歟伏念某一介小生自結髮讀書竊不喜泥陳言於紙上唯知以心明經故每見古人有得於曾中者莫不歸心焉迺者誦先察院之遺編遐想其人恨不生同其時豈期效官下吏遭遇閣下持節於此星軺所屆士爭先睹某既幸班上道周一望履舄之塵冲然體貌温然詞氣先察院之典刑已瞭然心目間雖未獲經座側而其所得已不貲

矣重念其甌石無儲慈親垂白孤寒乏虺蜉之援擁腫
類樗櫟之材獨知心以明經幸在節下儻蒙察其如是
收置陶冶使通儒之門有如某輩異時羽翼閣下之道
豈若籍湜之未保其弗畔耶伏惟幸赦其愚而許之

再答高解元請解孟子書

某伏辱再書曲示渠渠之意詞彩燦爛若明霞之映日
感服殆不勝言抑其間有宜辨者故不敢嘿嘿夫足下
所欲知孟子者將使為之訓詁以訓釋其文義耶抑欲

知道之淵源耶若止求訓釋則自趙歧而下歷世不乏
僕亦何所容喙若求知道則道不可以言傳而可以意
得昔者聖人言滿天下無口過以其隨叩即答無意訓
釋其文義而道之精微出於文義之表者或未聞也且
以孔孟談經言之孔子於碩人之詩則稱繪事後素孟
子於小弁之詩則叙親親之怨未嘗專於訓釋而語與
意會自然高妙使漢儒談經如許則古人可以端拜而
議後世不鄙漢儒之為漢儒矣今僕試因足下之教操

觚擿紙每事書數十語於其下亦固不難直恐後世有
愛僕之書者必曰孟氏之意止是爾夫聖人之意未易
窮盡隨其所得之淺深小以成小大以成大初無一定
之論而使後世或妄測之以為不能過是則盲天下之
目聾天下之耳者由僕也敢不謹哉齊公讀書於堂上
輪扁斲輪於堂下宜乎趨捨之不侔至論聖人之意則
齊公有媿於輪扁者所主異也足下儻務明聖人之意
而不區區於文義之間七篇當無餘蘊不然則是雷霆

震地而不聞日月中天而不見雖有充棟汗牛之訓釋
恐亦無補於道也適方還自村落偶覩所惠信筆為復
不成文理足下亮之可也

記

壽鄉記 代作

曜靈在奎夾鍾入奏仁風扇而花氣濃素魄弦而瑞光
滿客有乘雲御風神游乎八極之表飄然而至壽鄉壽
鄉去塵世不知其幾千萬里以樂為境以福為基以道

德為習俗其提封之廣袤又不知其幾萬里企而望之
則金霄紫房玉帝之都俯而得之則碧濤翠釜蓬萊之
館東涉青藜之林則箕張翼舒霞光萬丈亘乎蒼龍之
尾傳說成有商之治上而君乎此也西歷蟠

闕

銀浪萬頃極乎金樞之淵王母感漢氏之

闕

也南鄰老人之區光芒燦燭北接太微之
庭簷弁旁午皆目力之所不能窮紺綃絳綵聳峙以為
門闕金墉玉阜周環以為城郭仙吹動而鈞天鳴春光

融而雲露暖旌幢憂擊環珮丁東涉其津涯而未至其
閭奧者蓋紛紛然皆是龐眉揚而青瞳方素髮垂而丹
臉渥手策靈壽足納飛鳧相與入乎不夜之圃登乎自
得之場挂玉户扣金鏞俄然有人出而應門蒼髯竦立
望之蔚然者曰吾五大夫十八公也曳九岐之綵綬垂
覆甲之青絲者曰吾清江使者蔡十朋也頂烟華之紫
冠被飄蕭之羽服者曰吾華表真人丁令威也三人于
是止踵門之衆至獨揖而進之履香蹊度春嶺逡巡而

至乎介眉之堂上有珠閣萬仞琪花千層丹臺紫府金
闕玉京長生之書森列乎左右蓋不可得而悉數望其
中則芝華絳節侍人如林羽蓋之下祥烟瑞馥郁郁葱
葱環擁乎玉貌之座詢之則曰此壽鄉主人之居也客
曰主人為誰可得而見否乎三人從容而語客曰子亦
知夫人世有所謂冰雪道貌錦繡文腸笑踏月窟取丹
桂之一枝閑步金閨壓青錢之萬選典誥鏘於帝耳風
標聳於道山登秘殿憩琳宮優游難老以遂其生者乎

實吾鄉之主人也且其流慶蓋有興禮樂於搶攘之塗
措生靈於仁壽之域化日舒而百志寧春臺熙而民氣
樂其陰功鉅德上格于天天實報之長生久視而吾主
人常布武於鳳池以並享無窮之休計其壽考則沆瀣
浮杯醉千齡於旦暮絳紗籠體閱億載於須臾向也及
門而不入者尚足以追蹤於老彭筵跡於喬松矧宅是
居者宜如何耶客乃竦然寤肅然請曰向之所述得非
某人乎大夫曰其幾是矣其出游人間世三千春矣歲

寒之舊諒不我遺吾將率真人之羽駕拉使者之雲駟
往而從之以為逍遙游客以謂可否乎客曰夫龍門數
仞虎士羣呵輪蹄萃而紫霧飛簪履趨而香塵暗不有
為贄又何以知諸君之來乎三人相視而笑曰然哉然
哉於是大夫誦清風之謠使者賦巢蓮之歌而真人詠
芝田之詩使客坐聽客得之恍然而歸尚能記其髣髴
翌日乃我公夢熊之辰也因緣之為左右獻且以侑壽
觴云清風之謠曰清都風露非塵寰颺然不墮青蘋間

千春邂逅儻一至飄飄直上蓬萊山蓬萊山在何許寧
似吾鄉鄰帝所主人試起為披襟請向空冥奏宮羽巢
蓮之歌曰蕊沼芙蓉葉蒼壁柱有葉田田翠雲縷不須一
嚼藕如船已覺沈疴蛻輕舉吾嘗跌宕任真游巢居此
葉千春秋主人儻可醉霞液好把吾廬當玉甌芝田之
歌曰玉腴萬井真神倉華清挽水滋滄浪翱翔吾已謝
飢渴飲啄人知非稻粱九莖噴彩有餘瑞三秀臨風無
奈香主人聊與一爽口日月緩轡如吾鄉

劉忠顯公祠堂記

宣和初忠顯劉公守會稽迺二年冬青谿盜大起遂陷
抗睦明年春衢婺處亦失守於是乘銳四出直擣會稽
逢蠶蝻緣孤堞岌岌賊怙其衆意公必嬰城欲以持久
困之而公迺亟開關麾衆出戰賊遂大潰死者相枕於
野自是不敢復東時永嘉臨海四明以會稽為蔽障卒
賴以全制書策勲自徽猷閣待制大中大夫拜述古殿
直學士正奉大夫於是天下識與不識皆期公大用其

後雖不幸不至輔相然守封疆死國難忠貫白日義感異類哀榮之典震耀一時秩宗奉常攷靖康死事之臣足以追配李忠愍者惟公一人故謚曰忠顯某後五十年來領郡事實公建功立事之地獲拜公生祠于圓通精舍雖棟宇湫隘混於羣衲繪像中邦人猶能肅共奉祀如公尚存思慕誦說如公始去盛德之容凜然如生望之足以廉貪而起懦嗚呼盛哉某既徙公像于清獻趙公祠宇又記其事于石以示後世惟公無恙時有生

祠二南惟會稽北惟真定皆以禦寇捍難大功于是一邦
也會稽之祠葺矣今天子神聖英武將北復趙魏廓清
中原則真定之祠行亦汛掃某雖老矣尚庶幾見之

序

送孫季和赴遂安序

子游為武城夫子聞其絃歌嘗戲之曰割雞焉用牛刀
子游以所得於夫子者對夫子不能奪蓋有民人社稷
大而天下小而一邑皆當以道化也今季和去為遂安

其以道化乎其從事於簿書期會汲汲征利以趨目前之急如俗吏之所為乎吾知季和有志於道也夫道化豈終不享其利乎儻百里之內君子愛人小人易使利斯在焉第當優柔涵養以須其成爾季和蘊蓄操履著聞於時嚴廊有聖天子當路皆良有司不患名之不顯仕之不達當以道化為先則後世卓魯不得窺其涯矣將行序以送之紹熙辛亥中春朔吉鄮峯真隱史某序

送壽居仁序

君臣父子之道天性也父子有親君臣有義性之情也
佛之教乃欲去君臣離父子是忘情也夫情豈能忘哉
忘情是土木偶人爾彼其投身救虎割肉餵鷹哀物之
饑豈忘情乎付囑此道於後末世憫物之迷豈忘情乎
是故學佛之至者忘情之中有真情存焉今世之學佛
者負重名住大刹以利物為心有纖芥不悅於中則打
包陞座拂袖便行去則窮日之力忽然有違恤我後之
意人以為達真情安在哉此山壽師來住寶奎未幾倦

游欲去乃力舉所知以為代又為之經理其未備使繼之者安居然後逡巡而退真情發露和氣藹然是於忘情之中有真情真情之中又無我也其學佛之至者歟其行也序以送之紹熙辛亥二月丙申鄭峯真隱史某序

鄭峯真隱漫錄卷三十二

欽定四庫全書

鄧峯真隱漫錄卷三十三

宋 史浩 撰

贊

會稽先賢祠傳贊上 高尚之士

漢嚴先生

先生字子陵諱光一諱遵會稽餘姚人少有高名與
光武同游學及帝即位乃變姓名隱而不見帝思其

賢令物色訪之齊國言有男子披羊裘釣澤中帝疑
先生乃備安車玄纁遣使聘之三反而後至車駕幸
其館先生卧不起帝即其卧所撫先生腹曰咄咄子
陵不可相助為理耶先生良久熟眎曰昔唐堯著德
巢父洗耳士固有志何至相迫乎帝嘆息而去復引
先生入論道故舊因共偃卧先生以足加帝腹上明
日太史奏客星犯御座帝笑曰朕故人嚴子陵共卧
耳除為諫議大夫不屈乃耕於富春山後人名其釣

處為嚴陵瀨年八十終於家

事載後漢書逸民傳贊曰

採芝南山昔在園綺國有大疑投袂而起羊裘澤中可止則止得聖之時遠希夫子

漢王先生

先生字仲任諱充會稽上虞人也少孤鄉里稱孝後到京師受業太學師事扶風班叔皮好博覽而不守章句家貧無書常游洛陽市肆閱所賣書一見輒能誦憶遂博通衆流百家之言後居鄉里屏居教授仕

郡為功曹以數諫諍不合去閉門潛思絕慶弔之禮
戶牖牆壁各置刀筆著論衡八十五篇二十餘萬言
友人同郡謝夷吾上書薦先生才學肅宗特詔公車
召病不行乃造養性書十六篇裁節嗜慾頤神自守

永元中卒于家

事載後漢書列傳

贊曰

方寸如何納五車書孰知空洞可包太虛我觀論衡經
世所須先生之志豈曰隱居

漢袁先生

先生字正甫諱忠汝南汝陽人與范孟博為友同陷
黨獄得釋後為沛相乘輦車到官以清亮稱及天下
亂棄官客會稽上虞常乘船戴笠蓋詣太守王朗相
見朗僮從奢麗鄙之即辭疾發而退

事載後漢書
表邵公傳

替

曰

孟博傑士千載不朽欲知若人請觀其友奢麗驕矜正
直所醜尚想先生掩耳直走

漢桓先生

先生字文林諱暄一諱嚴

又或作儼

沛郡人克修志介仕

為郡功曹後舉孝廉有道方正茂才三公並辟皆不

應初平中避地會稽住止山陰縣故魯相鍾離子阿

舍太守王朗餉給糧食布帛一無所受臨去之際屋

中尺寸之物悉疏付主人纖微不漏移居揚州從事

屈豫室中庭橘實熟乃以竹籬橘四面風吹落兩實

以繩繫著橘枝每當危亡之急其志彌固後浮海客

交趾越人化其節至問里不為訟

事載後漢書桓春卿傳

贊曰

聖哲居齊嘗辭兼金先生拒餉孟氏之心我後千載來
游山陰清風律貪懷哉文林

魏嵇先生

先生字叔夜諱康其先會稽上虞人有奇才而土木
形骸不自藻飾人以為龍章鳳姿天質自然恬靜寡
欲好老莊常修養性服食之事彈琴詠詩自足於懷
著養生論所與人交者惟陳留阮嗣宗河內山巨源
豫其流者河內向子期沛國劉伯倫嗣宗兄子仲容

瑯琊王濬仲遂為竹林之游世所謂竹林七賢也先生嘗採藥游山澤會其得意忽焉忘返汲郡山中見孫公和遂從之游山巨源將去選官舉先生自代先生乃與書告絕又撰上古以來高士為之傳贊欲友其人於千載也

事載晉書列傳贊曰

五馬食槽將同祖龍中散人傑以直弗容採藥山澤寄懷絲桐追配首陽萃乎高風

晉孔先生

先生字敬康諱愉會稽山陰人年十三而孤養祖母
以孝聞與同郡張偉康丁世康齊名時人號曰會稽
三康先生遷於洛惠帝末東還會稽入新安山中改
姓孫氏以稼穡讀書為務信著隣里後忽捨去皆謂
之神人而為之立祠東晉初仕至會稽內史封為下
亭侯在郡三年乃營山陰湖南侯山下數畝地為宅
草屋數間便棄官居之送資百數萬悉無所取

事載
晉書

列傳
贊曰

我訪遺迹侯山之陰竹栢松栴百畝蕭森平湖渺然鳧
鷺飛沈匪濯我纓實洗我心

晉虞先生

先生字仲寧諱喜會稽餘姚人少立操行博學好古
郡察孝廉舉秀才司徒辟皆不就懷帝即位公車召
拜博士不就太寧中以博士召不就復下詔曰虞某
潔靜其操歲寒不移研精墳典居今行古志操足以
厲俗博學足以明道前雖不至其更以博士召之辭

疾不就咸康初詔以散騎常侍召之又不就凡所註

述數十萬言行於世

事載晉書
儒林傳

贊曰

鳳翔千仞下覽德輝公之終隱世與我違嗟嗟俗子
突梯脂韋蕭然遠引寥廓高飛

晉阮先生

先生字思曠諱裕陳留尉氏人也以德業知名咸和
初除尚書郎去職還家居會稽剡縣司徒王茂弘引
為從事中郎固辭不就朝廷將欲召之先生知不得

已乃求為王舒長史舒薨除吏部不就即家拜臨海太守
少時去職詔為秘書監以疾辭復除東陽太守尋召
為侍中不就還剡山有肥遁之志有以問王逸少逸
少曰此公近不驚寵辱雖古之沈冥何以過此先生
嘗以事至京師事畢便還諸人追之不及劉真長嘆
曰我入東正當泊安石渚下耳不敢復近思曠傍在
山東久之復召為散騎常侍領國子祭酒俄而復以
為金紫光祿大夫領瑯琊王師經年敦逼並無所就

先生終日靜默無所修綜而物自宗焉

事載晉書
阮嗣宗傳 贊

曰

王劉勝士下視一世獨於先生斂衽知畏靜默冲虛超然無累尚友蜀莊其又奚媿

晉王先生

先生字逸少諱羲之琅琊人司徒茂弘之從子也少有美譽朝廷公卿皆愛其才器為右軍將軍會稽內史雅好服食養性不樂在京師初渡浙江便有終焉

之志會稽有佳山水名士多居之謝安石未仕時亦
居焉孫興公李弘度許掾支道林等皆以文義冠世
並築室東土與先生同好嘗與同志宴集於會稽山
陰之蘭亭先生自為之序以申其志後稱病去郡於
父母墓前自誓不仕與東土人士盡山水之游弋釣
為娛又與道士許叔玄共修服食採石不遠千里徧
游東中諸郡窮諸名山泛滄海嘆曰我卒當以樂死
終身不復起

事載晉書列傳 贊曰

先生棄官如視土芥人亦有言孤竹之隘我獨知之大
易之介不俟終日於是乎在

晉謝先生

先生字安石諱安陽夏人寓居會稽與王逸少許椽支
道林游處出則漁弋山水入則言詠屬文無出世意
揚州刺史康季堅以先生有重名必欲致之不得已
赴召月餘求歸復除尚書瑯琊王友並不起吏部尚
書范玄平舉先生為吏部郎先生以書拒絕之有司

奏先生被召歷年不至禁錮終身遂棲遲東土常往
臨安山中坐石室臨濬谷悠然嘆曰此與伯夷何遠
後仕至太保雖受朝寄然東山之志始末不渝每形
於顏色及鎮新城盡室而行造汎海之莊欲須經略

粗定自江道還東雅志未就而卒

事載晉書列傳

贊曰

先生在東若將終身晚乃強起談笑經綸酒杯奕局坐
清烟塵我觀東山匪渭即莘

晉謝先生

先生字慶緒諱敷會稽人也性澄靜寡欲入太平山
十餘年辟命皆不就初月犯少微一名處士星占者
以隱士當之譙國戴安道有美才時人憂之俄而先
生死故會稽人士以嘲吳人云吳中高士求死不得
死事載晉書
隱逸傳贊曰

先生避世考槃林泉身老且窮厥聲隱然史占少微有
變在躔齋志何憾知我者天

晉戴先生

先生字安道諱達譙國人少博學好談論善屬文能
鼓琴工書畫其餘工藝靡不畢綜太宰武陵王晞聞
其善鼓琴使人召之先生對使者破琴曰戴安道不
為王門伶人居會稽之剡縣性高潔常以禮度自處
深以放達為非孝武帝時以散騎侍郎國子博士累
召辭以疾不就郡縣敦逼不已乃逃于吳會稽內史
謝幼度慮先生遠遁不反乃上疏請絕其召命帝許
之先生復還剡後召之復不至

事載晉書
隱逸傳

贊曰

魏晉俗壞以放濟荒滔滔敗世託名老莊先生隆禮將
砭世育義氣英發破琴之剛

宋孔先生

先生字彥深諱淳之魯人居剡性好山水每有所遊
必獨窮幽峻或旬日忘歸與徵士戴仲若王弘之及
王敬弘等共為方外之游會稽太守謝方明苦要之
不能致使謂曰苟不入吾郡何為入吾郭先生笑曰
潛游者不識其水巢栖者不辨其林飛沈所至何問

其主終不肯往茅室蓬戶庭草蕪徑唯床上有數帙
書宋元嘉初召為散騎侍郎乃逃于上虞界中家人

莫知所在

事載南史
隱逸傳

贊曰

先生居剡其徒自魯世雖莫考殆出宣父聖蓋歷聘公
則窮處是豈不同或默或語

宋戴先生

先生字仲若諱顥安道子也會稽剡縣多名山故世
居剡下與兄並受琴於父父歿所傳之聲不忍復奏

各造新弄兄制五部先生制十五部先生又制長
一部並傳於世桐廬縣又多名山兄弟復共游之
留居山兄卒先生以桐廬僻遠難以養疾乃出居
下士人共為築室聚石引水植林開澗少時繁密
若自然乃述莊周大旨著逍遙論禮記中庸篇元
中召不就又止京口黃鶴山山北竹林精舍宋文
每欲見之常謂黃門侍郎張敷曰吾東巡之日當

戴公山下也

事戴南史
隱逸傳

贊曰

二戴之禮著於西京先生父子家樂揚名中庸奧旨
揮誠明聖道得傳軒冕何輕

宋朱先生

先生史失其字諱百年會稽山陰人少有高情攜
孔氏入會稽南山伐樵採箬為業以樵箬置道傍
為行人所取明旦已復如此人稍恠之積久方知
朱隱士所賣須者隨其所堪多少留錢取樵箬而
或遇寒雪樵箬不售無以自資輒自榜船送妻還

氏天晴迎之先生好飲酒遇醉或失之頗言玄理時
為詩詠有高勝之言隱迹避人惟與同縣孔顛友善
顛亦嗜酒相得輒酬對盡歡顏峻為東揚州餉先生
米五百斛不受後卒山中蔡興宗為會稽太守餉先
生妻米百斛先生妻遣婢詣郡門奉辭固讓時人美
之以比梁鴻妻事載南史
隱逸傳 贊曰

夷齊去周採薇食之禦寇辭粟彼非我知顏峻之餉可
却不疑清哉先生百世之師

宋孔先生

先生史失其字諱祐敬康曾孫也至行通神隱于會稽四明山嘗見山谷中有數百斛錢視之如瓦石不異採樵者競取入手即成沙礫曾有鹿中箭來投先生為之養創愈然後去太守王僧虔欲引為主簿不可屈先生子道徽與杜景齊友善少厲高行能世其家風隱居南山終身不窺都邑齊豫章王嶷為揚州辟西曹書佐不至鄉里宗族慕之道徽兄子總有操

行遇飢寒不可得衣食縣令丘仲孚薦之除竟陵王

侍郎竟不至

事載南史
隱逸傳

贊曰

貪夫徇利或死懷璧公不動心視同瓦礫素風薰陶厥
子絕識一門清節迺祖遺德

齊褚先生

先生字元璩諱伯玉錢塘人少有隱操寡嗜愆年十
八父為之婚婦入前門先生從後門出遂往剡居瀑
布山性耐寒暑三十餘年隔絕人物王僧達為吳郡

以禮致之先生不得已停郡信宿纔交數言而退宋
孝建二年召聘不就齊高帝即位手詔吳會二郡以
禮迎遣又辭疾上不欲違其志敕於剡白石山立太
平館舍之卒年八十六先生常居樓上仍塋樓所事載

南史隱 贊曰
逸傳

先生高潔脫身辭婚樂道無悶卒老丘園邦君請交贈
以數言視彼温伯我則已煩

梁何先生

先生字子季諱胤廬江瀟人師事劉子珪受易及禮記毛詩又入山中定林寺聽內典其業皆通仕至中書令雖貴顯常懷止足建武初已築室郊外常與學徒游處其內既而遂賣園宅欲入東乃拜表解職不待報輒去有詔許之以會稽山多靈異往游焉居若耶山雲門寺初先生二兄子有子皙並棲遁子有先卒至是先生又隱世號子皙為大山先生為小山亦曰東山世謂何氏三高梁武帝踐祚詔為特進不起

有勅給白衣尚書祿固辭又勅山陰庫錢月給五萬
又不受乃勅何子朗孔壽等六人於東山受學先生
以若耶勢迫隘不容學徒乃遷秦望山山有飛泉乃
起學舍即林成檐因岩為堵別為小閣室寢處其中

躬自起閉僮僕無得至者

事載南史何彥德傳

贊曰

秦望之山煙雨岑岑其下若耶清見百尋尚覲後人來
憇雲林登山臨淵宛見吾心

唐秦先生

先生字公緒諱系越州會稽人北都留守薛兼訓奏
為右衛率府倉曹參軍不就客泉州南安九日山大
松百餘結廬其上穴石為硯注老子彌年不出刺史
薛播數往見之歲時致羊酒未嘗至城門張建封聞
其不可致請就加校書郎其後東度秣陵年八十餘
卒南安人思之號其山為高士峯事載唐書
隱逸傳贊曰
先生卜築松陰蔽廬清風滿空琴瑟笙竽下視塵世蚊
雷渠汚我知其心游物之初

唐張先生

先生字子同諱志和金華人居江湖自稱煙波釣徒
著書號玄真子亦以自號兄鶴齡恐其遁世為築室
越州東郭茨以生草椽棟不施斤斧豹席椽屨每垂
釣不設餌志不在魚也觀察使陳少游往見為終日
留表其居曰玄真坊以門隘為買地大其閔號為軒
巷先生善圖山水或擊鼓吹笛舐筆輒成嘗誦漁歌
憲宗圖真求其歌不能致李文饒稱先生隱而有名

顯而無事不窮不達嚴子陵之比云

事載唐書
隱逸傳

贊曰

玄真築室椽棟不斲千騎從之扣戶剥啄素隱孤標九
原孰作英英子陵擬之無忤

鄭峯真隱漫錄卷三十三

欽定四庫全書

鄖峯真隱漫錄卷三十四

宋史浩撰

贊

會稽先賢祠傳贊下

列仙之儒

越相范公

越相字少伯諱蠡事周師太公望好食飲桂水為越大夫佐越王破吳後乘輕舟入海變名姓適齊為鴟

夷子皮之陶為朱公朱公財累億萬號陶朱公復棄

之蘭陵賣藥後有見之者

事見劉子政列仙傳

贊曰

水幾於道隨器員方公既霸越歸復富強游戲萬事無用弗臧真得道者死而不亡

漢南昌尉梅公

公字子真諱福九江壽春人也少學長安明尚書穀梁春秋為郡文學補南昌尉後去官歸壽春數因縣道上言變事求假軺傳詣行在所條對急政輒報罷

時成帝委任王鳳專勢擅朝京兆尹王章素忠直譏刺鳳為鳳所誅王氏寢盛災異數見臣下莫敢正言公復上書力言誅章之過以譏切王氏然不見納又上言宜封孔子後以奉湯祀公居家常讀書養性為事至元始中王莽專政公一朝棄妻子去九江至今傳以為仙其後人有見公於會稽者變名姓為吳市門卒云今山陰之地有山曰梅山有鄉曰梅市有里曰梅里圖經載會稽記云吳市門即此也

事載前漢書列傳并

圖經贊曰

會稽在漢地兼吳越公隱市門或游禹穴野鶴孤雲孰能羈紲百世之風尚馳忠烈

漢太尉鄭公

太尉字巨君諱弘會稽山陰人世傳會稽射的山南有白鶴山此鶴為仙人取箭太尉嘗採薪得二遺箭頃有人覓太尉還之問何所欲太尉識其非人也曰常患若耶溪載薪為難願旦南風暮北風後果然故若

耶溪風至今猶然呼為鄭公風也後任至太尉以劾
奏竇憲楊光不宜處位因乞骸骨歸未許病篤上書
陳謝并言竇憲之短臨歿悉還賜物勅妻子褐巾布
衣素棺殯殮以還鄉里

事載後漢書列傳

贊曰

射的萬仞藤蘿絡之仙靈所止可信不疑樵風適意飄飄
水湄千載之下敬仰遺祠

漢魏先生

先生諱伯陽或以為字會稽上虞人高門之子性好

道術不肯仕修真潛默養志虛玄博瞻文詞通諸緯
候入山將弟子三人作神丹丹成知弟子心不盡乃
試之曰丹今雖成當先服之入口即死獨有一弟子
曰吾師非凡人也服此而死將有意耳乃亦服丹即
復死餘弟子不服乃共出山為求棺木先生即起將
服丹弟子而去因逢人入山伐木故作書於鄉里寄
謝二弟子作參同契五相類凡三卷其說似解周易
竇假爻象以論作丹之意

事載葛稚川神仙傳

贊曰

藏室萬卷充溢棟宇孰如參同可究脈縷允蹈其詮飄
然輕舉稽首琅函丹經之祖

漢薊先生

先生諱子訓不知所由來建安中客在濟陰宛句有神
異之道流名京師士大夫乘風向慕之乃駕驢車詣
許下既到公卿以下候之者座上常數百人皆為設
酒脯終日不匱後因遁去不知所止去之日惟見
白雲騰起從旦至暮如是數十處時有百歲翁自說

童兒時見先生賣藥於會稽市顏色不異於今後復
於長安東霸城見之與一老公摩挲銅人相謂曰適
見鑄此已近五百歲矣顧視見人而去猶駕昔所乘
驢車也見者呼之曰蘄先生少住並應之若遲徐而
走馬不及於是而絕

事載後漢書方術傳贊曰

至人得道八極飛騰徜徉塵世驢車是乘半千年間谷
或為陵摩挲銅狄幾閱廢興

吳上虞令劉公

令君字伯經諱綱下邳人也初居四明山後為上虞
令師事白君受道歷年道成邀親故會別飲食畢登
大皂莢木上去地十餘丈舉手而別忽然飛入雲中
而去妻樊夫人亦有道術俱昇天今白水觀乃其遺

迹云

事載葛稚川神仙傳及白水觀碑

贊曰

天人幾何同寄一塵士局耳目分妄與真劉公登天如
適其鄰以水投水同則相親

吳介先生

先生字元則諱象會稽人也學通春秋博覽百家之書陰修道法入東嶽授氣禁之術於山中見一女子蓋仙人也先生即叩頭乞長生以丹方一首授之告曰得此便仙勿他為也吳先主召至武昌甚敬重之稱為介君為起第宅以御帳給之先生求去不許自言某月日病先主使左右以一梨賜之先生便死先主殯埋之發視其棺無尸以所住屋為廟時時往祭之常有白鵠來集座上良久乃去後弟子見先生在

蓋竹山中

事載葛稚川神仙傳及三國志趙達傳

贊曰

先生之學志在春秋抗情物表躡空遠游巢父辭堯而况仲謀供張何物乃欲吾留

吳趙先生

先生諱廣信陽城人魏末渡江之剡小白山受禮法成服氣法又受師左君守玄中之道內見五藏徹視法如此凡七八十年周旋於郡國或賣藥出入人間人莫知也多來都下市井作九華丹丹成遂乘雲駕

龍白日登天

事載真語贊曰

真人登天丹為階梯公煉九華壽與天齊世或疑謗彼
哉醯雞安得人人乞與刀圭

吳虞先生

先生諱翁生會稽人受仙人介君食日精法以吳時
隱狼伍山蕪行雲氣回形之道精思積久形體更少
如童子後乘雲昇天

事載真語贊曰

餐日之效沆瀣莫肩咀嚙絳津九芒森然公能行之羽

翩跹躩乘雲清都何千萬年

晉夏先生

先生字仲御諱統會稽永興人嘗詣洛中市藥會三
月上已洛中王公以下並至浮橋士女車服屬路先
生在船中曝藥並不之顧太尉賈充怪而問之徐答
曰會稽夏仲御也充耀以文武鹵簿鼓吹車乘又使
妓女匝繞其船先生危坐如故若無所聞充等各散
曰此吳兒木人石心也先生歸會稽不知所終

事載
晉書

隱逸
傳 贊曰

賈氏巨猾實斲晉室高人視之何啻鬼魅淫聲亂色耳目之賊謂予不見我心匪石

晉葛仙公

仙公字孝仙諱玄丹陽句容人從左元放受九丹金液仙經常服餌求長生能絕穀連年不饑曾游會稽有賈人從海中還過神廟廟使主簿因以函書擲賈人船頭如釘著板拔不可得還達會稽輒以報仙公

仙公自往取之即得也語弟子張恭曰吾不得治作
大藥今當作尸解去八月十二日申時當發至期衣
冠入室而卧氣色不變弟子焚香守三日三夜夜半
中忽大風起發屋折木聲響如雷燭滅良久風止然
燭失仙公所在但見衣在而帶不解以其學道得仙
故號曰葛仙公今會稽有仙公釣磯及鍊丹井具在

事載葛稚川神仙傳及
晉書葛稚川傳及圖經贊曰

先生丹術咫尺雲路治鍊弗時蟬蛻而去苔磯碧井今

有遺處風靜月明倘一回顧

晉抱朴子葛公

抱朴子字稚川諱洪本作弘仙公從孫以儒學知名
性寡慾不好榮利閉門却掃究覽經籍尤好神仙導
養之法初仙公以鍊丹秘術授弟子鄭君稚川就鄭
君悉得其法咸和初選為散騎常侍固辭不就聞交
趾出丹求為句漏令乃止羅浮山鍊丹在山積年優
游閒養著述不輟著內外篇凡一百一十六篇自號

抱朴子因以名書年八十一卒顏色如生體柔軟舉
尸入棺輕如空衣世以為尸解得仙輿地志云上虞
縣蘭芎山葛稚川所棲隱也今會稽有仙公遺跡志

多據此稚川蓋亦嘗至焉

事載晉書列傳及圖經

贊曰

蘭芎之顛石盞甘泉靈雨不溢旱亦泓然是一勺水坐
閱千年我挹我酌如見稚川

晉長史許公

長史字思立諱謚少知名儒雅清素博學有才章簡

文皇帝久垂俗表之碩與時賢多所儔結少仕郡主
簿功曹史王茂弘蔡道明辟從事不赴選補太學博
士出為餘姚令入為尚書郎郡中正護軍長史雖外
混俗務而內修真學密授教記遵行上道挺分所得
乃為上清真人少子靜泰久居會稽禹井山頗遵承
家法傳授經書云事載真誥贊曰
逸少弃官自誓甚確先生從仕乃修真學丹鳳高翔野
鶴俛啄迹雖不同同是超卓

齊顧先生

先生字景怡一字玄平諱歡鹽官人家貧鄉中有學舍無以受業於舍壁後倚聽無遺忘者夕則然松節讀書或然糠自照及長篤志不倦聞吳興東遷郡玄之能傳五經文句假為書師從之受業年二十餘更從豫章雷仲倫懿通玄儒諸義遂隱不仕於剡天台山開館聚徒受業者常近百人山陰白石村多邪病村人告訴求哀先生往村中為講老子病者皆愈又有

病邪者問先生先生曰家有何書答曰惟有孝經而已先生曰可取仲尼居置病人枕邊恭敬之自差也而後病者果愈齊高帝輔政徵為揚州主簿及踐阼乃至稱山谷臣進政綱一卷優詔稱美東歸賜麈尾素琴年六十歲卒於剡山身體香軟道家謂之屍解仙化焉

事載南史
隱逸傳

贊曰

萬法惟心邪不奸正老子孝經亦能已病我知先生中有依証咨爾後來其母不敬

齊光祿大夫孔公

光祿史失其字諱靈產會稽山陰人宋泰始中罷晉
安太守有隱遁之志於禹井山立館事道精篤元徽
中為中散大夫頗解星文術數齊高帝輔政沈攸之
起兵光祿白高帝曰攸之兵雖強以天時冥數而觀
無能為也高帝驗其言擢遷光祿大夫餉以白羽扇
素隱凡曰君有古人之風故贈君古人之服當世榮
之於是守志山阿懷道畢世後解形潛蛻云

事載南史孔德

金匱要略卷之三
卷三十四
璋傳及龍
瑞山記
贊曰

其善者機星緯之傳孰知光祿一念通天眇視汚世泉石終焉勿以方伎浼此大賢

齊杜先生

先生字景齋諱京產吳郡錢塘人也少恬靜絕意榮宦頗涉文義專修黃老會稽孔覲清剛有峻節一見而為歎交永明十年召為奉朝請不至於會稽石門山聚徒教授建武初召為負外散騎侍郎先生曰莊

生持釣豈為白壁所回辭疾不就

事載南史
隱逸傳

贊曰

黃帝之學演為耑周清淨無為道家者流公獨修之不
改久幽騎省雖貴其亦犧牛

梁貞白陶先生

先生字通明諱弘景丹陽秣陵人十歲得葛稚川神
仙傳晝夜研尋便有養生之志齊高帝作相引為諸
王侍讀永明中脫朝冠挂神武門上表辭祿許之勅
所在月給伏苓五斤白蜜二升以供服餌止於句容

之曲山立館號華陽隱居仙書云眼方者壽千歲先生晚年一眼有時而方梁大同二年卒年八十五顏色不變香氣累日謚貞白先生案內傳言先生嘗遐遁東邁改名氏曰王整宮稱外兵會稽陶宴嶺有先生遺迹嶺由此得名又上虞縣釣臺山夏侯曾地志言先生嘗乘槎釣於山下潭中

事載南史隱逸傳及內傳及圖經贊

曰

公來山陰史氏弗傳遐遁東邁蓋見內篇青嶂碧潭遺

迹粲然翔鸞舞鶴來往翩翩

唐秘書監賀公

秘書監字季真諱知章會稽永興人性曠夷善譚說
與族姑子陸象先善象先嘗謂人曰季真清淡風流吾
一日不見則鄙吝生矣擢進士超拔羣類科仕至秘
書監晚自號四明狂客每醉輒屬辭筆不停書咸有
可觀天寶初病夢游帝居數日寤乃請為道士還鄉
里詔許之以宅為千秋觀而居又乞周官湖數頃為

放生池有許昂者撰通和先生祖貫碑云賀監得攝
生之妙負笈賣藥數百年不死後於天台昇仙當元
和間通和嘗遇之授斷穀丹經云

事載唐書隱逸傳及高道傳贊

曰

天寶諸公衮衮臺省黃冠告歸奚止官冷鏡湖之宮烟
水千頃尚想先生月落酒醒

唐宗元吳先生

宗元先生字真節諱筠華陰人性高鯁不耐沉浮於

時去居南陽倚帝山天寶初召至京師請隸道士籍
乃入嵩山南游天台觀滄海與有名士相娛樂文辭
傳京師明皇遣使召見大同殿與語甚說獻玄綱三
篇帝嘗問道對曰深於道者無如老子五千文其餘
徒喪紙札耳復問神仙治鍊法對曰此野人事積歲
求之非人主宜留意先生每開陳皆名教世務天子
重之詔為立道館安祿山欲稱兵乃還茅山因東入
會稽剡中卒弟子私謚為宗元先生

事載唐書
隱逸傳 贊曰

金史卷之八十四
卷三十四
漢魏之間道書雲集下逮隋唐更益擴拾公障頽波砥
柱屹立獨尊老氏盡空藥笈

嚴先生

先生諱青會稽人也遇神仙授素書一卷曰汝骨應
得長生先生言我不識書當奈何神人曰不須讀也
但以潔器盛之置高處耳并教服石髓法先生受之
無他佳器惟有飲壺乃用以盛所授書即便見其左
右常有數十人侍之治病救患但以所授書到其人


家所病便愈百姓尊奉之後斷穀不食一年入小霍

山仙矣

事載葛稚川神仙傳不著時代

贊曰

素書眇然信則如神雖有文字其惟天真彼讀萬卷行
或病民我祠先生用愧斯人



鄭峯真隱漫錄卷三十四

欽定四庫全書

集部

鄧峰真隱漫錄卷三十五至

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官中書臣張曾效

繕錄監生臣陳秉寧

欽定四庫全書

鄧峯真隱漫錄卷三十五

宋史浩撰

贊

洪都道士傳得一求贊淳熙改元四月吉日三山

郡齋書

誰把丹青獨露堂堂彼何人斯亦在吾傍熟視不語其
音琅琅允有所相永融太陽

四明十二先生贊

蓬萊黃公先生

商於六里肥遁四賢公居其間美行卓然時乎一出羽翼翩翩漢祚四百由茲卜年

大梅梅公先生

堂堂伊人漢世之傑方時昏昏上書剴切退伏市門或來明越我游大梅尚想忠烈

石臺葛公先生

公游宇內踪跡殆徧一月千江無處不見大隱石臺波
光如練山巔丹井清可靚面

石憲賀公先生

道既不逢去當勇決野服黃冠孰能羈紲鄞水煙波鏡
湖風月高標凜凜濯世炎熱

大隱揚公先生

道契皇王德參天地俯仰窺察出處一致三聘及門疾
驅遠避齊魯大夫公其無二

慈谿杜公先生

伊歟高高抱道弗違下視流俗突梯脂韋荆國之請叩
其玄微九原可作非公誰歸

甬水王公先生

生負大材棲于甬水雖有聲名且無生理陋巷簞瓢王
公知己百世聞風莫不興起

西湖樓公先生

翁臨西蜀袞化南閩公以是教作成吾鄞逮今士子儒

學彬彬收功貽厥世有顯人

桃源王公先生

公修隱德約處桃源文肩李杜行踵淵騫教育千里執
經滿門天之報施煌煌後昆

望春王公先生

使者入境金橘是求公責以義彼實懷羞晚使作邑投
劾歸休鄧城彭澤千載同流

湖西周公先生

宦遊寡偶不如投閒言之孔易行則惟艱公乎勇退雙
鬢未班葉月蘋風誰復追攀

奉化孫公先生

朱梁僭竊公懷憤恥仕還民服年著甲子寥寥唐末有
茲義士遺編雖存惜無信史

真隱居士自贊

道服仙巾盤陀燕坐觀者欣然謂即是我於此可求靈
珠一顆何以知之石中有火

二 為彌堅書

貌雖寒薄少病長年心雖鄙野樂善好賢施恩不責報
效受敵却反矜憐進則彰我后之德退斯遠當世之權
無乃不求媚於人而求媚於天者乎達識於此見道大
全知其不可以貌取而可以心傳則此尺素吾無取焉

三 為女淨真書

仙巾鹿裘燕坐優游茹芝玩世竹石是儔不知裏許却
有陽秋寄言具眼者莫向筆端求

四 為女妙音書

仙冠道服鶴髮童顏寂然不動風靜雲閒滄溟萬頃著
在中間若能會得何必觀瀾

五 為女妙勝書

內秉靈臺之夷坦外彰道貌之冲融和氣既歸於素籥
正音斯洽於絲桐友千齡之龜鶴理三徑之菊松鴻冥
冥而高舉笑弋者之彎弓

六 為女孫妙雲書

足躡坦途身騎白鹿貌既蕭散心無局促鼓雲和之虛
暢來微風之清穆其誰知之伯牙一曲

七

道與之貌天與之形畫史具眼運筆不停若其空洞萬
頃滄溟只恐畫史徒費丹青

八

官身乞得自由身不著我冠只葛巾若也於斯能薦得
始知天地有閒人

九

漚在海中起滅無迹畫史窺見一班是以具茲形色在
吾旁者貌行行而心翼翼不然何以寶吾陋影而求吾
真迹邪

竹院曇少雲得古畫雲龍垂之堂上坐間似覺風
雨晦冥迫而視之鱗鬣頭角蜿蜒翔舞有葛陂仙
去之象求贊於真隱居士走筆為書

神龍窟宅依憑太空升潛有道變化無窮固非一體可

得形容誰將尺素幻此靈通滄然雲霧不見其踪我欲
乘之上造蒼穹作為雷雨滲漉華戎令彼早歲咸歌屢
豐却歸環堵藏一粟中驚奔還走回笈葉公

永嘉長住長蘆心聞責師真贊

清清冷冷如風過耳灑灑落落如月在水其孤標逸韻
真可廉貪而律鄙若夫道之在天下歷千古而不死又
何必視幻影於斷縑鑽遺言於故紙嗚呼是為長靈之
孫無示之嗣後學之師心聞老子

衆請贊劉岳真士繪像

高垂一幅生綃月滿雲收寥廓到得形神俱妙畫師摸
索不著

故內相北海先生綦公之姪孫更生奉遺像求贊
堂堂綦公人之龍獨步一世鬱為文宗遂令學者霧
集雲從凡百君子式是德容

鄭峯真隱漫錄卷三十五

欽定四庫全書

鄭峯真隱漫錄卷三十六

宋 史浩 撰

題跋

跋御筆賜母咸安太夫人酒果

臣某隆興改元備位參知政事臣母咸安郡太夫人洪氏年且八十就養執政府皇帝陛下聖性純孝知臣粗謹事親臣母生朝歲歲賚以金器繒綵薰茗之屬以為

常每進對必蒙勞問甚寵乃因元日詔錫上尊珍果俾為私庭之壽既而臣除右僕射正謝之日再降御札以賜臣母母子相顧感泣下拜距今二十有三年臣不忠不孝老病且死終無秋毫上酬主恩下為親顯惟是伏念陛下所以寵光私門益將勸天下之為人臣為人子者臣既已弗稱若又使聖君錫類之意不克布宣臣罪滋大是敢摹刻堅珉與天下臣子共之倘繼此竭忠効節立身揚名之士為時而出則臣區區之願塞矣淳熙

十二年正月望日具位臣史某恭書

跋御筆獎諭詔

皇帝陛下踐阼之初勵精圖治思與天下更始驟擢臣
自庶官再閱月而為執政恃臣為腹心倚臣為股肱手
詔寵頒期望過甚臣朝夕思念惟懼無以稱塞凡陛下
內而孝兩宮友恩平臣不敢不贊美外而修百度恤民
隱臣不敢不將順獨於用兵不敢輕議督府謀山東臣
則曰昔勾踐報吳二十餘年乃克遂志若取山東雖至

青鄆敵巢未必可窺倘兩淮無備一郡失守則二浙騷然不可不慮今姑可練士卒積資糧以固吾圉不宜彰虛聲以致敵俟養威蓄力十年之後可議恢復矣西師守德順臣則曰昔諸葛亮常攻今鳳翔之地以進則得長安而天下可圖也姜維代之乃西取隴右每取一郡則分兵以守關隘無備鄧艾得以亡蜀若取德順雖至熙原敵境固無甚損倘分兵以守一有窺測則西蜀騷然不可不慮今姑可選將帥備器械以觀其釁不宜疲

人費財以餌敵十年之後東南兵舉可謂犄角矣方陛下
下一新庶政咸思奮起以赴功名之會故不喜此迂緩
之謀反以此訾臣不知臣實不忍欺陛下也蓋臣受委
任異於稠人其敢崇虛名抗高論以為已謀哉至於納
降臣亦弗敢當邊郵擾蕩之后創痍未泯調度益繁誠
不欲以有限之租斂飽無用之流亡謂宜休養民力俟
家給人足乃可為之既而臣以建議不同丐歸之後用
兵則卒無成效使士馬器械遺亡殆盡納降則終不得

用徒困於廩給財計未充幸賴陛下仁慈恭儉勤積累然而恢復之舉未能仰稱聖意蓋以臣望輕德淺不足以服衆心材拙謀疎不足以回衆論十年之約遂成空談臣罪萬死故因敬刻詔旨并狀臣罪亦以明前日羣臣失謀之誤非陛下之素志也淳熙十一年歲在甲辰九月丙戌朔具位臣史某拜手稽首恭書

跋御書聖主得賢臣頌

紹興庚辰光堯壽聖憲天體道太上皇帝不以臣不肖

擢為司封員外郎今上皇帝潛府直講臣恭覩聖質元
良尊嚴簡默講學之隙無他嗜好惟翰墨自娛取前言
往訓有裨於治道者親灑宸毫連編插架無有厭數一
日出漢臣王褒聖主得賢臣頌獨以畀臣且曰聖主在
上求賢才如弗及故有是贈臣再拜受而藏之歲在壬
午陛下龍飛大寶臣待罪右輔竊思所賜軸末實有御
名而一介微臣蒙以字呼堂陛之分未肅非所以風示
天下請歸之御府聖恩未許乃乾道壬辰臣承乏假守

七閩且奏事闕下泊一再對從容宴侍躬進此書越明年九月上遣使即臣治所賜御書二軸其一則再書褒所作頌也臣瞻企九重蹈舞下拜炷香伏讀天日開明雲煙飛動震耀心目臣謹拜手稽首言曰惟聖與賢天地遼絕自昔帝王欲立非常之功者雖其智勇不世出亦必求賢以自輔其未得之如飢渴之於飲食既得之則精神聚會歡然交欣禁止令行治功日起巨魚縱壑鴻毛遇風誠非過諭然則君臣相須理固然也仰惟陛

下洞明此理雖聖神文武出於天縱猶且當饋遐想慨
然有感於斯文顧臣何人兩拜茲寵內揆無庸莫知稱
塞栗栗震懼無地自容方今忠良俊乂布滿朝列惟陛
下委任而責成之則中興盛烈日月可覲臣雖老矣尚
庶幾見之謹奉宸藻餼諸樂石以傳無窮俾萬邦黎獻
咸知聖天子樂於賢臣之心云淳熙甲午七月望日具
位臣史某恭書

跋御製曲宴澄碧殿詩

皇帝陛下踐位之十六載臣蒙恩再侍經幄賜召見眷禮益隆乃九月丙辰錫宴澄碧殿酒半陛下舉玉趾臨澄碧臣獲從遊山光水聲互相發越恍然如在蓬萊方丈間從容談道賜盃無算抵暮詔宿玉堂之直廬顧謂臣此會不可以無紀臣欽承睿命斐然成詩敘所以感遇之意以進陛下繼錫宸章俯同其韻日星昭回下賁蕪纈華袞之寵奚啻一言皆非臣不肖所宜蒙也臣下拜跪誦仰見聖學高明文章煥發旋轉乾坤工極造化

一篇之中屢致志焉曰治道貴清淨聖言有深旨又曰
躋民期仁壽詎肯中道止此則有志於自治也曰東都
會諸侯宣王昔於是又曰都護萬年觴何當至庭所此
則有志於服遠也夫內而自治外而服遠二者不本之
從諫未有能致之者曰虛心欲受人忠言資逆耳又曰
期爾罄嘉謀使我勲業起大哉言乎臣於此乃知陛下
深得致斯二者之本也昔傳說告高宗曰惟木從繩則
正后從諫則聖高宗聽之遂能克鬼方隆商祚是知自

古聖君立志有為亦未嘗不以從諫為先務今陛下既已明示厥旨豈惟臣愚願殫一得仰報毫分抑中外濟濟之士或謀獻之已告或策畫之欲成莫不益思展盡以輔成聖志則陛下是詩之作其功用不既大矣乎中興跬可俟也直筆以記臣雖衰老尚幸見之謹奉聖旨勒之樂石垂訓萬代又刻臣鄙句於下方庶昭宸章之工侈非常之賜云淳熙四年歲在丁酉十月丁卯朔吉具位臣史某恭書

跋御製長春花詩

臣恭惟皇帝陛下仁參造化道極範圍與物為春之心
雖遊宴賦詠之間曾不少置頃者以臣乞還田里屢詔
不許乃御製長春花詩遣中人即臣賜第宣示以見聖
志雲漢昭回高出風雅固非臣所能窺測臣下拜跪誦
惟深感激竊不自揆昧死賡續方俯伏愧恐而鴻私曲
被既不加譴乃復用初韻以賜姑取其無妨賢嫉能之
微誠而貸其久竊寵祿不能少贊天地化育之大罪臣

羸老即死何地論報惟知虔奉宸章勒之樂石以傳無窮且附臣鄙拙之辭于下方使天下後世仰知聖主片言必錄所以保子孫黎民於億萬年之久者實由此心則臣歸美之報尚庶幾焉淳熙十一年十月望日具位臣史某拜手稽首謹誌

跋高宗皇帝御筆賜香茶送行

臣某伏以淳熙八年夏五月蒙皇帝閱其衰疾許以東歸具奏德壽宮乞陞辭乃八月癸丑恭被光堯聖壽憲

天體道性仁誠德經武緯文太上皇帝陛下親詔免朝
仍賜御香龍茶以華其歸重念臣策名委質實在其紹
興偶階獎知獲事嗣聖遂以謫薄待罪羣臣之右夙夜
慄慄懼于大刑善貸曲成以迄今日又獲奉身以退出
處粗全仰惟兩宮天地父母覆載顧復之恩至深至廣
如此而一介孤臣待罪閭巷無復可圖犬馬之報徒能
摹勒宸翰刻之金石以昭示天下後世昔漢之綺園非
拔尤於高帝唐之房杜特見遇於太宗以今視昔臣竊

有榮耀焉然前無羽翼調護之功後無輔相彌縫之益
茲榮也祇所以為愧歟淳熙九年正月癸未具位臣史某
拜手稽首謹書

跋御製東歸送行詩

臣某伏以淳熙八年五月壬寅蒙恩以臣累牘請老進
拜少師食內祠祿歸守先墓又詔俟秋乃發越八月乙
巳既有行日蒙賜宴秘殿宣勸贐錫恩意隆渥且賜御
書御製詩一首以寵其行臣惶懼跪捧再拜稱謝繼以

涕泣伏念臣昔侍潛藩遂躋近弼迨今二十餘年同時
際會之臣淪謝畧盡臣疾憊支離巋然獨存獲假餘息
親見盛際然而再當鈞軸三備經幄卒無秋毫補報罪
宜萬死陛下任人圖舊置相惟終使保首領以從先臣
於地下固已幸甚又况異數明恩蔽由聖志奎文羲畫
申賁晚途曠數十百年無與為比臣伏見在太宗皇帝
神宗皇帝時有若韓王趙普潞公文彥博之將退也皆
嘗賜御詩而不聞出於宸翰在仁宗皇帝時有若許公

呂夷簡鄧公張士遜之告老也皆嘗賜御書而未嘗形於聖作豈繫具臣績用勿昭顧乃蒙被恩榮超冠古昔震悸隕越不遑夙夜竊不自揆敢昧死用普彥博夷簡士遜前比摹刻琬琰傳示無極庶幾萬邦黎民咸知聖主眷禮臣下如此惟勤丕應後志以訖太平嵬嵬之功則臣尚足以贖空餐非據之罪於司敗也臣不勝大願淳熙九年正月癸未具位臣史某拜手稽首謹書

跋御製入謝送行詩

臣某以淳熙癸卯冬得請謝事旋有旨用故事入謝明年春被旨趣行以三月對四月辭自對至辭恩數隆赫臣某悉皇恐懇避多獲聽許於是賜御製詩一首以寵其歸俛乎雲漢不足以為光鏘乎咸韶不足以為美臣百拜以謝三沐以觀什襲以藏猶以為不克稱恩遇也躬自摹勒刻之琬琰且拜手稽首對揚王休曰前席之資及於衰朽陛下之好賢也推此心則竒材碩德將接迹於朝路矣忠僮之求迨於聞退陛下之納諫也廣此

志則嘉言明謨將日沃於宸聰矣願陛下無忘所以假寵老臣者以均被多士而致太平臣雖待盡歆畝以是為報其尚庶幾乎淳熙十一年十月日具位臣史某拜
手稽首謹書

跋御書明良慶會之閣

臣伏自皇帝陛下毓德潛藩以經入侍遭際興運代賈近司二十年間致位公保所賜手詔聖製充溢私篋年運而往侵尋遲暮一旦先狗馬填溝壑銜恩弗報齎恨

及泉遂以祿賜所積建閣於私第之東北阡用謹宸奎
之藏不先以聞罪當萬死不謂乃蒙聖恩賜臣御書明
良慶會之閣六大字及申命中使馳賜上方所製扁榜
所以假寵臣者至深至厚臣竊惟恩畀閣名雖存故事
然隆興以來輔相被賜則自臣始鏤金塗碧鬼鬼煌煌
炳煥九霄震曜萬宇與滎河溫洛之秘異世同符衰瘁
老臣死且不朽謹摹勒琬琰仍以墨本上之御府副在
有司以待制詔頒付史官傳信後世臣不勝大願淳熙

十二年正月望日具位臣史某拜手稽首謹書

跋御草書舊學二字

淳熙戊戌四月朔吉臣待罪右丞相上遣使至都堂傳
宣賜臣御書舊學二字臣下拜跪受同列敬瞻羨嘆咸
謂臣曰自古依光日月際會風雲未有如今日之盛者
請鏡諸堅珉永為都堂榮觀臣曰不可昔商高宗嘗學
於甘盤甘盤得道之士也授受之際必有一言深相感
發故雖久而念之不忘舊學之名甘盤受之則無愧如

臣愚陋曩玷執經之列曾無絲髮上裨光明何可輒當
此名矧敢揭諸政事之堂乎第當什襲謹藏為家至寶
暨告歸田里私竊自念雖臣孱瑣不足以仰承大賜然
使聖主所以寵嘉愚臣之意不白於天下後世臣之罪
大矣於是命工刻之以為子孫不朽之傳若夫草聖之
精體備八法羣目聳觀龍蛇蜿蜒雲煙飛動則竭臣鄙
駘之文不能形容萬分之一姑敘拜賜之歲月云歲在辛
丑十月望日具官臣史某拜手稽首恭書

跋御真書舊學二字

淳熙戊申夏六月辛卯皇帝遣使再賜臣以舊學二字
仍宣諭曰曩所賜字筆畫微草今易以楷奎壁之光薦
燭蓬華縉紳聳瞻歎未曾有臣下拜登受仰戴隆恩未
知報所臣竊念自思歲在戊申再塵右輔嘗蒙此賜迨
今十稔復拜珍貺從天而降罔測厥繇仰惟陛下孝德
純篤冠冕百王不取漢景從父之令躬執通喪覲收商
宗夢弼之祥共凝至治念昔商宗之恭默蓋思甘盤所

傳之道天監精誠賚以傳說故方宅憂軫記微臣有及
於此臣夙以淺陋獲事初潛執經佔俾譬之爝火螢光
不足上裨日月之華耀安敢仰當甘盤舊學之名臣知
陛下市腐骨將以致絕足也然臣今日觀股肱大臣朝
夕納誨百僚庶尹俊又如林則光輔中興伐鬼方朝諸
侯以成嘉靖之功如運之掌固不俟形諸夢寐訪諸巖野
而聖心猶惓惓若此豈非德日又新高賢不已以至於
斯乎在易大有上九之辭曰自天祐之吉无不利繫辭

謂履信思順又以尚賢是以獲茲利也臣謹奉宸章勒之樂石昭示億世使咸知聖主享天之祐於萬斯年實又以尚賢之效此臣區區歸美之志也具官臣史某拜
手稽首恭書

跋徐明叔為張達權篆正心誠意樂天知命八字
右八字刑部徐公為錢塘張君達權作初刑部游鄞達
權乃求榜其池臺館宇而以是請士之為致知格物無
方無體之學者徃徃聞而喜之今又取石他山深刻以

傳遠後之覽者能推原本旨確有所得俾不為屋壁長物乃其志也

跋趙宗正詩

曩讀公詩歎其雄深幽遠有魏晉間一種風味殆非後世詩流晚從公之孫樂善遊出公所為行狀自言嗜詩齊宋而下弗好於是益知前者非過論也紹興庚午臘月四明史某書於真隱齋

跋趙恭夫所藏焦公路帖

頃聞焦公路先生山東一布衣聲稱滿朝丞相趙公元鎮欲薦不可尊禮之甚隆心深慕焉洎公路寓四明大涵山之麓人頗籍籍道公路家居修容妻子不見少懈出與物接規矩古禮徃徃見笑於世俗夷俚倨肆者不變也於是始得一見望之儼然即之溫然則心已服及聆其言接其意乃有大過人者信乎名下無虛士也今公路雖往一時從學尚遵禮法如公路無恙時去而仕官反鄉曲人之見之不問皆知其為焦公弟子玉牒恭

夫尤其上列出此帖以求跋三復斯文如見公路紹興
辛巳元夕後二日四明史某跋

跋李季可百說

季可百說如蜂房醞蜜中邊皆甜食者能知其採擷衆
芳飄泊乎風煙雨露之變得之勤而成之不易庶乎旨
其餘味季可洛人居錢塘城中一室空空無有惟作書
史活計即之似無意於世者至語用兵理財治劇之方
亶亶有緒乃知季可不為無用之學使得行其學百說

殆其善者機也紹興辛巳六月吉日四明史某書

跋胡元高之父讓宣聖編年

余頃得此書於大學不知誰所為嘗跋其後曰釋家者
流能以佛之終始作為成道記吾中國聖人堂堂言行
著在六籍百家學者不能萃為一書以貽後世視之寧
無愧今此書殆是補亡深合鄙志為之擊節雖然聖人
之道施諸父子之仁君臣之義夫婦之別長幼之序朋
友之信涵浸斯民歷千萬世民之飲食起居無日不與

聖人接尚何待窺陳迹於方冊間耶余於此取其顛末貫穿該括無遺其愛慕聖人與子貢築室獨居之心無以異也乾道癸巳余為福州京西漕使胡君仰遣价求跋於某始知此書乃其先君子作於是敬述前語以遺之秋七月望日鄭峯真隱史某跋

跋淮寧趙史君檄張邦昌書稿

靖康之難公以宗英之傑貽尺紙引大義使僭偽縮手逡巡退聽神器有歸卒成恢復算計見效不在平勃李

郭下其與朱虛侯蓋異日同道也劉歆輩而在或見此書必當羞死淳熙辛丑閏月吉日四明史某敬書

跋趙伯山從駕詩

承平時乘輿享原廟必因宮觀謂之帶過靖康初政軍旅事叢罷之此詩蓋作於宣和間故都全盛氣象與夫一時風流人物之勝猶可想也淳熙辛丑中元真隱居士史某跋

跋朱元章帖

元章字畫見之刻石猶欲飛動恨生晚不及觀其落筆
縱橫於淮山樓上也淳熙八年秋七月望日真隱居士
史某跋

跋陳忠肅公謝表稿

紹聖元符間京下方用事卞嘗取其外舅荆國王公日
錄潤色以傳會國是其中多詆誣神祖識者憤之而不
敢言忠肅陳公懼後世信然乃奮不顧為書數萬言力
闢其非是名尊堯集雖流離竄逐不利其身而抵排攘

斥不絕諸口卒使羣陰解散神祖之功德鬼鬼昭若日月其視孟氏辨揚墨韓氏黜佛老殆無以異某生恨晚不及識公然逮事先祖太師備聞公之貶四明也嘗與游從幽居南藍裘葛不足蔽體簞瓢不能繼日人不堪其憂而公溫然盛德之容了無愠色笑談舒愉若被文繡而飽膏粱者暨并謫台城欣然就道臨歧摻袂猶以京卞為憂非其所存介然不渝安能甘此此正特立獨行窮天地亘萬世而不顧者也蔣君如晦四明佳士自

其先世與公有舊得公手染謝表藏之筆畫適勁言辭
懇惻某再拜以視如覲公面喜幸之餘輒附名卷末淳
熙甲辰初伏具位臣史某敬書

跋張功父詩

綸言褒予正遭逢底事思歸作蠹蟲未信夏畦三日雨
能勝秋浦一絲風英英尊府分符譽煜煜先曾衛社功
寄語夫君當勉勵不耕何以望時豐淳熙丁未開鑪日
予過竹院曇師方摘紙為和章以勉臨安通守張君功

父子亦戲筆擬作示曇發一笑擲去後數日鄉友張呂道貽書寄以功父詩求予跋予方病未能也乃索前稿附之卷尾真隱居士跋

跋閒樂先生論金陵日曆書

尊君人臣之忠責善友朋之義閒樂先生此書可謂兩盡淳熙戊辰上巳先生孫昌年為明之錄叅不鄙獲垂示再拜一觀悚然敬慕其在於昔夷惠清和百世聞風尚皆興起矧親目忠義之言耶

跋楊廷秀秘監張魏公配享議

予觀此書敷敘條暢有作者關鍵世方寶其文章予獨取其節槩古人於知己漆身吞炭後世徃徃不然縱未彎弓下石其不面譽背毀者幾希此孟子語智之於賢者必歸之命也忠獻張公亡久矣今日忽有一國士報者可謂鳳鳴朝陽夫張之知揚不過吹噓獎進猶報之如許使國家而用斯人肯負吾君乎此予所以重其節槩也予平生受無垢先生張公之知至今寢飯不忘然

猶未知報所因有感於斯文故書

跋修法師釋氏通紀

浮屠德修少從仙林洪濟聽慈恩法已而更衣學禪辨道之餘能以筆墨誌其祖之始卒與夫先世傳授後業紹承編年類事凡華言梵語書籍所載碑刻所存無不蒐獵十年成書目曰釋氏通紀求跋於予予問曰無褒貶否對曰無之予嘉其不敢佔越擅史氏褒貶故為之過目焉夫修佛之徒也能集其祖之緒期不墜將來由

周迄今幾世幾年使觀者如指諸掌其用心亦勤矣吾
儒學聖人道貫穿古今固不乏人其間綴緝章句第取
青紫問先聖之始卒後學之傳紹往往有不知者得無
愧於斯乎予非譽修葺欲勉吾徒之弗逮者淳熙己酉
重陽日真隱居士史某書

跋易道士贈育王光老頌

遠陸相遇目擊道存茲雖善頌須是饒舌然不如是又
何以發淵明一笑耶淳熙己酉下元日鄮峯真隱因過

寶奎偶見戲書其後

鄮峯真隱漫錄卷三十六